

書名 司馬文正公集略三十一卷詩  
集七卷 嘉靖四年序刊本  
撰者 宋 司馬光 撰  
卷 卷三十  
內容分類 集 別集 北宋  
索書號 大木 集部 別集類 16  
編號 D7231700

# 卷三十



彩色首頁1

[東洋文化研究所漢籍目錄 編號: D7231700](#)

[東洋文化研究所漢籍目錄所藏漢籍善本文影像資料庫 索書號: 大木 集部 別集類 16](#)

[漢籍善本文影像資料庫文本 司馬文正公集略三十一卷詩集七卷 嘉靖四年序刊本](#)

[版權所有: 東京大學 東洋文化研究所](#)

[使用上的注意事項](#)

馬文正公集略卷之五

奏

論張方平狀  
嘉祐六年十一月十四日

右臣竊聞近者秦鳳路經略安撫使知秦州張方平承信邊  
人西夏點兵侵犯邊境惶擾失度閉門棄城移牒鄰  
路自救永興以西軍馬皆被抽發使近邊之民轉相  
驚動乃飛奏上聞致朝廷憂疑已而接省皆無  
隴騷然乃飛奏上聞致朝廷憂疑已而接省皆無  
平身為元帥繫一方安危舉措施為衆所瞻倚今  
臣竊恐戎狄聞之得以閱將帥之淺深益有輕  
非所以壯皇威鎮殊俗也伏望朝廷治方平之





誌二

殿中丞薛府君墓誌銘

熙寧五年作

魏晉之間薛氏始自蜀徙河東有部曲數千家永嘉之亂  
保河汾以自固歷劉石符氏莫能屈姚秦元魏以來始出  
仕為公侯卿相者比肩並起入唐尤盛號為甲族然率因  
遊宦去鄉里惟府君之先至今留居河東唐衰薛氏中微  
曾祖考諱昉不仕祖考諱允恭贈諫議大夫考諱田樞密  
直學士右諫議大夫贈太尉其行義功烈皆見於宋宣獻  
公所為太尉公之碑府君諱儀字式之太尉公之第二子  
始以父蔭為太廟齋郎又除守將作監主簿太尉公知益



州奏府君監鳳翔府商稅後徙知河東府君年少河東士  
民皆鄉里長老然素嚴憚府君不敢干以私府君御之亦  
不失恩義之中以父憂去官服除知鄆縣徙知文邑通判  
渭州州將武人不能謹廉州大吏郝正者把其陰事招權  
受賕莫敢詰府君至以正罪惡言於將請治之將內窘私  
以情告府君曰某止欲去惡吏耳必不使及君將亦知府  
君不欺即移疾以州事屬府君府君乃發正私出塞市馬  
收案伏法將不染於辭深德府君且內慙自是悉委事於  
府君後將知府君賢亦委以事如前將既而某官張君亢  
除知渭州或謂府君曰君自到渭名雖州佐其實將也張  
君有材而尚氣到必不爲君下彼不可以文法拘也君宜  
於事一無所與庶幾自免府君喟然嘆曰吾推忠信正直  
之心以事人豈好犯上而專事邪今張君來吾猶是心也  
使張君賢必不我怨如其不賢吾獲罪亦命而已矣豈可  
因人而變其守哉及張君至處事有失府君力爭如故必  
當理而後止僚吏皆爲之懼張君初無言又之乃於廣座  
謂衆曰亢喜忠義與身俱生遇事輒發不能顧慮故數爲  
小人所陷使爲亢佐者皆如薛君亢復何患於是聞者皆  
服張君之賢而重府君之正是時元昊數寇邊覆軍殺將  
朝廷患之乃命范文正公爲鄜延招討使以張君知鄜州  
爲范公之副張公即具奏府君在渭州所以佐已之狀乞  
移通判鄜州朝廷許之而府君母馮翊郡太君党氏春秋



高多疾顧戀鄉里不肯隨諸子之官府君兄弟用太尉公恩得宦河中者適皆罷去府君乃固辭鄜州願監河中鹽稅以便親既得請范公遽上奏曰朝廷從薛某之欲於其私固便然甚非張亢求與共事之意乞以薛某還亢仍爲徙其兄若弟鄉里一官以慰其心朝廷即以府君弟侏知河東縣府君鄜州府君不得已之官張君惠州城大而處勢艱難以待敵欲遷就伏龜山計功數十萬時虜乘勝深入而州無役兵欲以戰士築之衆咸以爲難府君獨以爲可張君喜曰薛君謂之可事無不成矣役始興而張君病失音府君外備寇敵內董役事人不知張君之病也城成民至今賴之歲餘徙知深州遭母憂服除知商州慶曆八年閏月庚戌終於州廨年五十一先是屬縣宰有建言商

山產銅請置監鑄錢朝廷下其議轉運使有是之者府君上言朝廷前置阜民監於州境洪崖冶鑄鐵錢未數年鐵已竭其監當廢況又益置銅錢監銅產尤薄恐徒勞費無益請以所得銅於舊監鑄錢銅竭而止章交上久不決會府君沒宰之說遂行縣官之費甚廣而銅尋竭如府君言宰坐抵罪府君居家孝友自幼能屬文始習律賦語意即高奇驚人然不肯從進士舉嘗著蓼蟲賦以刺世之嗜外物而忘其苦者又以爲事之當御者莫若言動交進名乃著五經文以自做觀是二文足以知其志趣矣初娶唐氏天章閣待制肅之女生一女適殿中丞趙士寧又娶劉氏



左諫議大夫綜之孫又娶李氏直集賢院建中之孫又娶  
陳氏司農卿宗元之女生二男長曰昌朝絲太子中允監  
察御史裏行坐正論不阿黜為大理寺丞次曰昌期早卒  
二女長適祕書省校書郎張煦次早卒昌期將以熙寧五  
年正月某甲子葬府君於本縣趙行村請直龍圖閣趙君  
高狀其治行以授光使為之誌昔者先子嘗獲知於太尉  
公從兄里佐府君於邠州幕光亦嘗拜府君於兄舍以是  
頗知府君之為人府君容貌溫恭而內守堅正不可奪移  
語言無機巧蔽匿而明察物情其志常在利民而深疾姦  
惡故所至上官信之僚友親之下民愛之今也幸使光誌  
其墓光既取趙君之狀詮次之又敢私附其所知云銘曰

近意宜踈而或以之親阿意宜合而或以之離蓋至誠可  
以待無窮而辭色不過欺一時嗚呼允如薛君以忠信正  
直為心夫又何施而不宜

駕部員外郎司馬府君墓誌銘熙寧九年作

兄諱某字周卿曾大父諱某大父諱某皆不仕父諱某以  
通毛詩屢應州舉名升禮部及兄登朝累贈衛尉卿母某  
氏封某縣太君司馬氏累世聚居食口常不減數十衛尉  
府君為之長兄年十六衛尉即以家事委之衣食均贍宗  
族無間言衛尉得以優游自適十餘年而終兄用從父太  
尉府君蔭補郊社齋郎太尉以家事非兄不能辦未聽從  
宦後數年乃調達州通川尉州有宣漢鹽井距州千餘里



唯一谿僅通小舟可以往來守井吏恃其險遠大爲姦利  
州遣兄往按之因爲之區處利害凡再往返遂革其弊考  
滿除華州司理叅軍州將驕貴數用私欲撓公法兄執不  
聽有幕僚性剛戾行將以下皆惡之共文致其罪俾兄鞠  
之幕僚復上書訟州官皆獲罪唯兄不染於辭人以是益  
知其公平有驍騎一餘卒犯罪謀亡去監押捕獲之誣云  
共圖不軌欲殺之以求功賞州官信之謂兄必考掠取服  
兄不從據實鞠之皆止杖罪餘囚負寃得直者甚衆既而  
遭繼母郭氏憂去官直寃者或炷香於頂臂以送之服除  
授解州聞喜尉用薦者遷大理寺丞知河中府猗氏縣徙  
閩州新井縣通判鄧均二州先是房州竹山有金谿出金

甚多山谷窮俗人跡罕至豪族專其利監司欲命官置場  
市之皆憚其險辭不行時兄年已踰六十奮曰利其祿而  
避其勞可乎遂往躋攀崖巘爲之經畫條目使公私俱利  
仍每月一按行凡歲餘乃還均州秩滿徙知梁山軍累官  
至駕部員外郎年甫七十體力尚壯即求致仕詔補子廣  
郊社齋郎廣爲號州盧氏主簿迎兄之官以熙寧八年十  
二月戊子朔暴得疾已丑終於官舍年七十有三兄爲人  
沈厚寬裕喜愠不形於外少時家貧有衣一笥夜遺火比  
家人覺狼狽救之笥衣已盡兄獨卧不起家人尤之曰燒  
衣蕩盡何心尚安卧邪兄曰衣已燒矣起視何益轉枕復  
寢人皆服其度量子孫僕役有過徐訓諭之不輕罵辱然



當官公直能知小民情僞吏不敢以絲毫欺也雖練習律令而不爲峭刻斷獄必求厭人心推抑彊猾扶衛愚弱所治職事皆有方略或素號繁劇者兄處之嘗有餘暇氣色不動而衆務修舉廷中未嘗寂無人聲其下皆畏而愛之久猶見思從仕三十餘年未嘗有過然性恬靜不自矜譽故人知之者亦鮮無所超越循常調終身兄亦不憾也其奉養儉素自爲布衣至二千石飲啜服用未嘗少異與鄉人居和易簡靜故沒之日聞者無不嘆惜先娶紐氏早終再娶張氏解州助教震之女柔靜慈良宜於族姻封清河縣君治平四年終於鄧州年五十八歲男四人曰齊曰庭曰廣曰房庭號州號略尉女四人長適解人樊景讓次適陝

人張安仁次二人未嫁皆早夭齊等以熙寧九年二月壬寅奉兄及嫂之喪葬於夏川鄉先塋之西南光以期日之迫不暇請於時之賢士大夫自爲之銘曰

廓然有容頽然無爭所蒞之政不煩而成去久而人益思無求而人莫知年至歸休始終無虧

贈都官郎中司馬君墓誌銘

嘉祐六年作

君諱某其先出自晉安平獻王自周隋之前家涑水之上至唐仕宦陵夷降在畎畝曾祖諱林祖諱政父諱炳累世曰饜食口甚衆父兄以君孝謹自幼以家事委之君晝夜服勤不遺餘力專以稼穡畜牧致饒給不事奇袤末業所獲悉以奉六親有餘則及鄉人身無私焉年三十二以某



年月日終某年月日葬於涑水南原先待制府君常嘆曰  
自吾兄之亡而家始貧使天下之民皆若吾兄之為雖古  
至治之世何以尚諸惜其無位而才不大施也夫人李氏  
同里人年二十八而寡父母欲奪其志夫家尊章亦遣焉  
夫人自誓不許惡衣蔬食躬執勤苦教畜二子詠里詠不  
幸半世里登進士第累遷尚書都官郎中歷典數州贈君  
官至尚書都官郎中夫人封永壽縣太君夫人為人孝慈  
勤儉中外宗族慕仰其德一無間言子為二千石極其榮  
養年八十二以某年月日終於京師某月日祔於君之墓  
光不及事君而事夫人又敢書聞見之實而繫之以銘銘曰  
士不得位善無所施勤儉于躬家道以肥宗族是賴鄉黨  
定師壽之少多命不可移有配有子後無棄基泚慙之效  
昭然不欺

蘇其驥墓石銘之作

蘇氏之先出自重黎忿生為周武王司寇封於溫世為卿  
士或謂之溫子春秋時蘇子為狄所滅子孫以邑為氏歷  
世久遠散之四方在洛陽者秦厲代以口辯顯戰國世在  
杜陵者建為漢名將子武使匈奴中十九年不屈節在武  
功者綽仕字文周以明法令為其官子威隋文帝佐命功  
臣至唐壞父子為賢相此其章章尤著者也周衰溫為晉  
邑漢屬河內郡隋以河內為懷州維修武之族不棄其故  
土留懷州不去公其後焉公諱某字某曾大父某大父某



皆不仕某贈左司衛率公幼慷慨有遠志自力讀書不治家事宗族爭笑且怒之曰汝世農家勤治耕桑以豐衣食汝忽棄業爲書生窮餒無日矣公曾不顧爲學益堅早喪二親哀毀過禮鄉曲稱之弱冠舉三傳科景德中契丹南侵河北盜賊盜起公於是盡散家財糾合鄉曲子弟結以信義扞禦群寇修武由是獲全大將軍某北征公踵軍門上謁延入與語兵事大悅即奏偕行至中山會契丹圍城甚急用公之策卒拒却之於是天子曰契丹犯塞河北士子躬被甲胄扞敵有功今天下貢舉已畢朕憐夫北方賢士大夫不得以時充貢其皆召試賜第公由是解褐補符離尉縣之寇盜吏卒單弱公獎訓率厲擒馘七十餘人闔

境清肅改河清主簿考滿吏民群詣轉運使以請留詔聽更留成資而去遷遂州錄事參軍本道論薦召對擢爲大理寺丞知大名縣事尋除通判州事入朝遷太子中舍國冢公前世故事分文武百官爲二塗其遷次任使皆不相參涉有願相移易者聽之以公素善武事加習邊務遂改供備庫副使知威勝軍事繼典嵐石鳳夔五州皆著聲績官歷東染院洛苑二副使其在夔州兼夔梓兩路兵馬都監提舉諸州巡檢兵甲賊盜事又之上表乞朝因言邊防民政諸利害稱旨遷右驍騎副使同提點湖南兩浙刑獄公事年七十四以慶曆二年十月十二日終於長沙官舍公始雖以學術爲文吏而性好勇有智略晚年夏寇苦



邊諸將多敗此無功公聞之嘆曰吾以布衣起家至方伯承兩朝恩澤不可勝紀家近趙魏粗習兵略今狂虜驕熒侵擾疆場而吾老病不得荷戈前驅以報萬一非命也夫然卒不得盡其志嗚呼哀哉夫人張氏先公即世子四人師古果州團練判官師為衛州司法參軍蒙臣獲嘉縣主簿李子師說及孫孝先曾孫林元皆三班借職餘孫若干人幼未官公之在荆湘也蒙臣為三班奉職以公高年多疾未告省侍朝廷以武吏求省侍無故事不許即乞改文職歸省六許之行及在葉間聞喪因號泣晝夜奔走凡七日行千三百里近世官遠方而歿者子孫多焚其柩以燼歸槨相習為常無幾謂者蒙臣獨奮曰為人子孫忍行此

豈人心也哉自長沙數千里奉柩以歸嗚呼其信知義而斷不與流俗者夫古人稱善人者其身不耀必在子孫豈信然邪某年月日葬於某所先府君之兆夫人張氏附光鄉邑於公近又承公之知故其於公之始終治行也於佗人為悉其諸子以碣文為請光何敢辭謹銘曰銘闕

繪畫縣尉張君墓誌銘

故翰林侍讀學士張公有子曰某前公若干年卒殯楚州後若干年與公偕葬襄城時皇祐五年閏月甲申也其弟大理寺丞光以治行來求銘光獲事侍讀公為日久又與君之兄弟遊今也不敢以愚陋辭而不為姑撰次其所聞納諸壙云君字仲倩其世家鄉黨見於侍讀公之碑君性



嗜學年十五志節已皦皦出人有從母孀居將從其女於  
保德軍子幼不能自致君奮曰人母子單弱如此於以涉  
遠我獨何心坐視之邪即白父母請送父母疑其尚少然  
聞其言甚說即遣之君冒盛寒往返數千里曾不爲勞人  
皆嘆其仁而有立以蔭補太廟齋郎及長調縉雲尉治有  
聲迺縣有淫祠曰五通人嚴事之歲旱君徧禱群祀不及  
五通吏民以爲請君不得已強往禱且卜之巫曰不吉必  
無雨比歸雨大至君笑曰果然雨不雨非妖鬼事也而敢  
屢爲變怪以驚愚民是不可不除即部吏卒焚滅其祠梓  
土偶人投江中歲亦大孰官滿歸道病或請留傳舍俟愈  
而行君曰吾官遠方不獲侍親之左右四年于此矣今幸  
歸至舍見吾親而死吾目瞋矣又何可留趣舟而前及楚  
州卒年二十八娶袁氏故諫議大夫煒之孫生二男綢試  
將作監主簿繼太常寺太祝二女其幼者早夭初侍讀公  
有五子光知其三人焉而不及識君三人者皆甚才然猶  
自謂不如也侍讀公沒兄弟寓居汝穎間食口衆無田宅  
以自給咸泣曰縉雲在吾屬豈憂此乎言其知力足賴而  
不遺其親也嗚呼使顯於朝而老所施設豈若是而已哉  
銘曰

苑彼嘉禾煒煒其華實而未碩孰披之柯人之明果胡壽  
不遐思而悲者豈伊其家

大理寺丞龐之道墓誌銘嘉祐八年作



龐之道名元魯故相國頴公之元子妣曰嘉興縣君邊氏  
其鄉里世系見於頴公之誌天聖中先君與頴公皆爲群  
牧判官居相近光朝夕與之道遊兄事之道時尚幼性  
明穎於文辭不待力學而自能讀書初如不措意已盡得  
其精要前輩見之皆驚嘆光年不相遠自視如土瓦之望  
珠玉穎公爲廣南東路轉運使奏之道試祕書省校書郎  
及爲知雜御史又奏守將作監主簿景祐五年光與之道  
同登進士第之道簽書懷州判官事未幾徙知河南縣事  
縣多豪貴家素號難治之道至繩案無所避豪貴爲之歛  
手徙簽書河中府判官事後數年光過河南問於野人曰  
龐君爲治何如曰明而有斷又問今宰曰不及龐君遠矣

乃知野人最不可欺而論議甚公也頴公爲郟延經略安  
撫使夫之道書機宜文字時方用兵文書填委或中宵不  
得寐頴公入爲樞密副使欲奏其勞爲之求升資之道辭  
曰將吏有功者願大人悉奏之元魯不足言也頴公喜而  
從之久之以大理寺丞監國子監書庫慶曆七年五月戊  
寅以疾終年三十二殯於薦巖佛舍之道事繼母劉夫人  
撫裔諸弟始終無間言及沒哭之皆哀不自勝終頴公之  
世親友不敢語及之道語之頴公未嘗不悲慟始光知之  
道敏於爲學及過河南又得其爲政焉其沒也益知之道  
孝友之行深矣先娶孫氏故都官員外郎道之女又娶張  
氏今吏部侍郎致仕存之女一女早卒遂無子嘉祐八年



六月壬申弟先英遷之道之柩葬於雍丘顏公之墓側祔以孫氏光爲之銘曰

學施於治孝友兼美官不登朝沒纔壯齒如光何人榮祿及此噫才固不足言直命而已矣

右班殿直傅君墓誌銘 皇祐五年作

熙寧二年春傅欽之遺光書曰昔我王考材氣過人宦不遂以沒堯俞幼鞠於王妣以至成人恩隱殊厚堯俞或以事夜艾未寢上妣常危坐待之及仕而之四方王妣不見再逾月則憂念氣滯而成癰逮王妣之亡竭堯俞之泣不足償癰之血也今將以其月某日舉吾王考妣之柩葬於濟源吾嘗與子同在諫省子幸而知我必爲我銘其墓

子苟自謂不能是愛其少頃之勤而使我抱終已之恨非

仁人之爲也光讀之愧且懼復書曰子以義責光光何敢

辭然門內之美光不得聞也子爲光叙其事以來光謹條

次之則可矣有間欽之以其狀來曰君諱某字寶五其先

大名內黃人世爲富家曾祖考諱思進始讀書爲儒祖考

諱凝贈虞部員外郎考諱世隆以春秋三傳登科官至駕

部員外郎知邛州事始家於鄆君少通尚書屢舉不中第

用親蔭補三班借職累遷至右班殿直初監澶州酒稅歷

齊州離濟寨酒稅廬州巡檢以事去官後監趙州倉知定

州新樂縣復以事去官已而監博州酒稅以疾罷歸明道

元年十月十日終於家壽六十一君爲人忼慨方嚴家之子



弟雖甚愛之不命坐不敢坐其當官明敏果斷在新樂有  
西山采木卒二百人謀劫其縣大呼自南門入君率左右  
操白挺逆之至則叱使坐卒不意君遽出皆愕不敢動君  
因罵之曰賊兵欲奚爲粹其爲魁者數人杖之各數十而  
縱之皆抑首去不敢出聲然不能與世浮沉平視貴要若  
無人故所至齟齬且老益窮因發狂疾棄官歸卧一歲所  
忽起召家人與訣語言如平生人乃疑其非狂也故相國  
王沂公爲諸生家居未與人接君即以公輔器之已而果  
然人不知其何用知之也夫人霍氏國子博士致仕若拙  
之孫篤於孝慈其父亡夫人未之知獨視雲烟草木皆慘  
悽變色泣下不能自止逾月而訃至後君二十二年年八

十一而終男某仕至山南東道節度推官知磁州昭德縣  
事贈工部郎中二女其長者蚤世幼適楊氏孫七人長曰  
堯俞字欽之今爲兵部員外郎次舜俞郊社齋郎次君俞  
未仕餘皆早世欽之爲諫官處大議正直無所顧避朝廷  
不能用其言除知雜御史欽之固辭不肯拜必求得罪以  
去知和州聲振天下嗚呼得非承其祖之風烈邪欽之以  
夫人嘗至濟源愛其土風遂築焉銘曰

氣直志剛難進易傷善抑不揚其後必昌皆理之常

府君判官杜君墓誌銘 嘉祐二年作

嘉祐二年秋光在京師進士杜知臣涕泣來言曰大人昔  
以進士得見於先公又與子遊寂久今不幸而沒子爲我



銘其墓光既吊因辭以不文不敢爲知臣固請曰佗人知  
臣所不敢請也故惟子之歸光廼曰然則願聞先君世  
系治行之詳知臣退以其狀來曰君諱陟字從聖其先自  
成都徙長江曾大父禮大父鐔皆不仕父昭文遂州長史  
君少好古學無所不闕著化坊三十一篇言王者以教化坊  
氏之道慶曆初天子詔諸州皆立學擇其士之賢有行者  
爲之師州人共推上君君屢舉進士有司失之卒以三禮釋  
褐選夔道尉考滿遷府州軍事判官力於吏治轉運使提  
點刑獄文章薦之會屬官有以姦賊敗者怨恨反誣訟君  
坐罷官去君詰闕欲自理未果遇疾以八月己巳終於理  
舍年五十有七娶譚氏生三子男知臣文長適卞宗建幼

適姚申皆舉進士嗚呼杜君觀其所學與所爲書其志豈  
欲如是而止哉卒無遇以窮斯可哀矣知臣負其喪歸以  
其年月日葬某地銘曰

學之也勤守之也專仕進迤邐又不求年嗚呼孰知其然  
必歸之天

贈太常博士吳君墓誌銘嘉祐五年作

君之先世家金鄉曾大父諱賁不仕大父諱豫贈太常丞  
始葬洛陽金谷鄉之尹里父諱禧太平興國中進士高第  
以公直材敏立名朝廷數忤權貴由是不得居中連典大  
州官至待御史亦葬尹里君諱元亨字子正用御史遺奏  
補太廟齋郎遷許州司士參軍選授永康尉歷河中府法



曹參軍馮翊令馮翊華陰以漆沮為境中間洲上有美田  
民相與爭之五十餘年吏不能決君檄華陰令會境上盡  
案兩鄉之籍徧覆其田執度以度之皆得其實自是民不  
敢復爭時人稱之君為人謹廉專以誠長者處官不能飾  
智巧以媚上故官久不遂官滿集吏部選除鄰水令還未  
至家道疾抵知洛陽縣李宋卿延之縣舍以天聖九年八  
月某日終年四十一宋卿主辦其喪殯於水安佛室夫人  
聶氏祕閣校理震之女後君五年長男顥先夫人二年皆  
不祿獨少男幾復年未冠及幼女一人相與居家無一金  
之產幾復於孤貧中能自刻意為學取進士第今為太常  
博士知蓬州事累贈君官至太常博士夫人封仙源縣太

光曰幾復奉先君夫人之遺體常恐不克續承祭祀今幸  
有祿族室家尚完矣念先君先夫人之夕未葬痛切不少  
忘于心况又遠宦於蜀忍置而去乎將以八月某日葬於  
梁縣之新豐鄉西成里子與我皆聶氏之甥也先君治行  
子皆知之其為我撰銘光曰懼不能堪子之命敢不諾銘曰  
御史之賢顯大於世及君恂恂清德不墜迨君之終家既  
相繼微蓬州之立吳氏幾廢嗚呼以君之慈良而沈抑不  
遂宜其有嗣

進士天君墓誌銘

君諱顥字其其先金鄉人曾祖其贈太常丞祖其侍御史



父某鄰水縣令贈太常博士鄰水府君娶於祕閣校理聶君某於某為從母鄰水府君之沒也先妣在鄭君哀經來入門哭且拜問故又哭先妣命與光處於是時君年尚未冠為人長大有容觀論議忼慨讀書屬文材敏過人為進士業已完美先妣嘆曰吾妹不幸早喪其良人今有是子也吾妹猶有望間二歲君以疾卒於蒲阪年二十一先妣聞之哭曰吾妹河負於天使至此極也已而弟幾復負其喪殯於汝州佛舍後二十六年幾復為太常博士乃舉其喪葬於梁縣從鄰水府君之兆時某年月日也銘曰  
特苗之秀未實而朽繫時之逢無有美醜骨兮有歸祭兮有休  
從先人夫又奚悲

清逸處士魏君墓誌銘嘉祐八年作

君諱開字雲夫世家于陝之東郊父諱野真宗皇帝時有大名累召終不能起贈著作郎君少喜為詩學鼓琴不樂仕進一遵著作君之志皇祐二年仁宗皇帝祀明堂詔天下求遺逸草萊年耆德茂者知府直史館李公昭進薦君再世有高節上嘉之賜號清逸處士嘉祐八年八月癸未終於家年八十四君自始生至沒當國家隆盛偃兵無事之時家有舊田廬君謹守而治之朝廷以著作君之賢復其子孫無有所與以故沛然自足無衣食之累性不嗜酒謹潔守法度然與人和浮沉間里不自標揭以故其生也人樂與之遊其沒也無謗言府縣之官或時延禮亦與之



往來然未嘗有毫髮之私以干之其政事夫得未嘗納於  
耳出於口也以故皆愛重之無厭倦少好養生大要用冲  
澹自守不以一物累其心以故視聽步趨能老而不衰鳴  
呼今之名處士者多矣或力爲奇譎以盜聲名萬一徼幸  
欲欺愚俗取美官或交游有位依其名勢乾沒射利以侵  
漁細民若是者雖不仕又足賢乎然則能保其福樂而免  
於過咎有如君者凡幾人邪君三娶曰臧氏曰趙氏曰皇  
甫氏子男一人曰樵女三人適進士梁軫張震左侍禁張  
宏孫男二人曰潛曰澤先僕射與著作君相愛如昆弟光  
拜君於髫鬣之年今也其孤將以某年月日葬君於某地  
來求銘光何敢辭銘曰

天長不息兮地大無疆人寓其中兮細於毫芒奪攘紛糾  
兮非愚則狂惟君之生兮遭世寧昌依承先德兮曄然有  
光笥有餘衣兮廩有餘糧養生以理兮行已有方居不煩  
人兮遊不出鄉逍遙自適兮既壽而康視彼公侯兮金朱  
煌煌憂勞沒齒兮或罹咎殃爲得孰多兮爲謀孰長

鄆州處士王君墓誌銘 嘉祐六年作

至和中光從故丞相龐公鎮鄆州公命光典州學學生王  
大臨通經有行誼光特愛重之後十五年王生來見光於  
京師曰大臨將以今年某月某日葬其親於須城縣長山  
之麓子爲我銘其墓光辭以拙於文生曰大臨遠來非有  
佗故唯銘之求朝士大夫以百數大臨無所詣唯子之歸



子何得拒之光愧其言不敢辭因曰然則願聞先子之行  
生乃出其邑人試祕書省校書郎梁君壽之狀以授光曰  
君諱惟德字輔之始爲童子父行戍於蜀君侍大父母撫  
諸弟以孝友聞其治家如成人大父母終君親負土成墳  
終喪不嘗酒肉父自蜀國家益富父好散施君竭力以助之  
有所干必稱父命以致之嘗舉三禮一試於禮部不中格  
喟然歸不復就舉專以養親治經爲事著禮說二十卷性  
溫厚喜導人爲善鄉里謂之王君子有闕者君徐以義理  
辯告皆悅曰君子幸教我我何敢違即解去不復詣吏年  
若干病亟歎曰死生有命恨不得終爲子之道以天聖五  
年十一月辛亥終再娶皆楊氏其後夫人贈職方員外郎

且之女也能成君之志順適舅姑使之終身無憂愠之容  
及老寢疾每祭祀猶強起執事年若干以嘉祐五年十二  
月己巳終子男五人長曰大順今爲剡縣主簿次未名次  
大同皆早世次宗道次大臨女二人長適大學館學究劉  
應祥次亦早世君既沒家甚貧六臨以善講解爲諸生師  
月受俸於州學錢二千積而不用滿三十萬乃舉兩世之  
柩而葬之光不及見君知其爲人以其子之賢與梁君之  
言於是乎銘銘曰

孝乎親友于其弟家有餘施及鄉里人悅其教稱爲君子  
嗚呼是亦爲政奚必仕

玉城縣君楊氏墓誌銘



夫人姓楊氏故尚書工部郎中直史館韓公之配也公之  
世系事業龍圖閣直學士郭公誌之矣夫人之先在唐為  
盛族居靖恭坊五代之亂衣冠之緒零落殆盡唯靖恭楊  
氏徙家于吳世有顯人迄今不絕考諱蛻仕至尚書司封  
郎中精於吏治所至著聲迹始韓公娶夫人之姊生男鑑  
鐸及二女不幸一世公曰楊氏名族吾既謀於宗而卜於  
庶矣不可易也公復請昏于夫人夫人年若干歸韓氏生  
男鎮鉞初封真公後更封玉城縣君為人慈和淵靜不喜聲  
味自少及長家人伺其動靜語默皆有常度未嘗移也其  
撫視六子衣服飲食無絲毫薄厚六子亦相與親愛如一  
雖中外族姻莫不知其為異母也年三十九而喪韓公三年

下始軍自是閉閣深居日誦佛書不復有自虞樂之語

五十以至和元年三月乙亥終其五月壬申附於公之墓  
時鑑為其官鎮為其官鐸為其官鉞已前卒鐸與光遊素  
父因狀夫人之行命光為之銘光不得辭曰  
允矣夫人德則均一而行有常邪承租之休宜于夫家而  
壽不將邪福祿當有餘而更不足子孫其昌邪

彭城縣君劉氏墓誌銘 嘉祐五年作

嘉祐五年某月日太常博士知蓬州事吳君幾復附其祖  
妣彭城縣君劉氏于祖考御史府君之墓始夫人之沒蓬  
州生二年矣比冠而父母兄皆即世家至貧漂泊汝洛間  
嘗記幼時聞其兄言夫人之殯在京師廣濟佛寺已而舉



進士及第乃求所以廣濟佛寺者凡有二焉在城之東西  
往問夫人之殯皆莫能知蓬州刻志求之積年不置一旦  
至五寺有僧老矣忽來訊曰君非鄰水令吳君之子邪曰  
然僧曰去三十載之前吳君殯其母夫人於是某爲童子  
手親塗之某亦吳姓也故能識之因指視其處蓬州未之  
敢信周視其塗圯剝且盡所餘如掌而鄰水府君之題識  
存焉乃莫而哭之又數年然後得合葬於洛陽之金谷鄉  
自始沒至葬四十二年矣意微是孫也則夫人之柩其復  
得邪露殯積久而題識獨存豈非鄰水府君自悼其不幸  
未葬而天陰相之邪乃知誠孝可以動鬼神信矣御史府  
君諱某鄰水府君諱某夫人平生行事不可復見其先單  
父人父爲尚書郎云銘曰  
夫人既歿吳氏中微四十餘年乃得其歸孝孫有立神實  
告之

程夫人墓誌銘 治平三年作

治平三年夏蘇府君終於京師光往弔焉二孤軾轍哭且  
言曰某將奉先君之柩歸葬於蜀蜀人之祔也同壟而異  
壙曰者吾母夫人之葬也未之銘子爲我銘其壙光固辭  
不獲命因曰夫人之德非異人所能知也願聞其略二孤  
奉其事狀拜以授光光拜受退而次之曰夫人姓程氏眉  
山人大理寺丞文應之女生十八年歸蘇氏程氏富而蘇  
氏極貧夫人入門執婦職孝恭勤儉族人環視之無絲毫



鞅鞅驕倨可譏訶狀由是共賢之或謂夫人曰若父母非  
乏於財以父母之愛若求之宜無不應者何爲甘此蔬糲  
獨不可以一發言乎夫人曰然以我求於父母誠無不可  
萬一使人謂吾夫爲求於人以活其妻子者將若之何卒  
不求時祖姑猶在堂老而性嚴家人過堂下履錯然有聲  
已畏獲臯獨夫人能順適其志祖姑見之必說府君年二  
十七猶不學一旦慨然謂夫人曰吾自視今猶可學然家  
待我而生學且廢生柰何夫人曰我欲言之久矣惡使子  
爲因我而學者子尙有志以生累我可也即罄出服玩鬻  
之以治生不數年遂爲官家府君由是得專志於學卒成  
大儒夫人喜讀書皆識其大義賦轍之幼也夫人親教之

常戒曰汝讀書勿效曹耦止欲以善自名而已每稱引古  
人名節以勵之曰汝果能死直道吾無戚焉已而二子同  
年登進士第又同登賢良方正科自宋興以來唯故資政  
殿大學士吳公育與軾制策入三等轍所對語尤切直驚  
人繇夫人素勗之也若夫人者可謂知愛其子矣始夫人  
視其家財既有餘廼歎曰是豈所謂福哉不已且愚吾子  
孫因求族姻之孤窮者悉爲嫁娶賑業之鄉人有急者時  
亦調焉比其沒家無一年之儲夫人以嘉祐二年四月癸  
丑終於鄉里其年十一月庚子葬某地年四十八軾登朝  
追封武陽縣君凡生六子長男景山及三女皆早夭幼女  
有夫人之風能屬文年十九既嫁而卒嗚呼婦人柔順足



以睦其族智能足以齊其家斯已賢矣况如夫人能開發  
輔導成就其夫子使皆以文學顯重於天下非識慮高絕  
能如是乎古之人稱有國有家者其興衰無不本於閨門  
今於夫人益見古人之可信也銘曰  
貧不以污其夫之名富不以為其子之累知力學可以顯  
其門而直道可以榮於世勉夫教子底于光大壽不充德  
福宜施於後嗣

叙濟河郡君元豐六年作

清河郡君張氏冀州信都人禮部尚書致仕存之女端明殿  
學士司馬光之妻也年十六適司馬氏夫登朝封清河縣  
君及為學士改郡君年六十元豐五年正月壬子晦終於

洛陽二月辛巳晦葬涑水先塋君性和柔敦實自始嫁至  
于瞑目未嘗見其有忿懣之色矯妄之言人雖以非意侵加  
默而受之終不與人辯曲直已亦不復貯於懷也上承舅  
姑旁接姊姒下撫甥姪莫不悅而安之御婢妾寬而知其  
勞苦無妬忌心嘗夜濯足婢誤以湯沃之爛其一足君批  
其頰數下而止病足月餘方愈故其沒也自族姻至於所  
養無親踈大小哭之極哀久而不衰咸出於惻怛非外飾  
也內外無一人私議其短者茲豈聲音笑貌之所能致邪  
平居謹於財不妄用自奉甚約及余用之以調親戚之急  
亦未嘗吝也始余為學官笥中衣無幾一夕盜入室盡卷  
以去時天向寒衾無繡絮客至無衫以見之余不能不嘆



嗟君笑曰但願身安財湏復有余賢其言爲之釋然近世墓皆有誌刻石摹其文以遺人余以爲婦人無外事有善不出閨門故止叙其事存於家庶使後世爲婦者有所矜式耳

華陰侯仲連墓誌銘 熙寧二年作

華陰侯仲連字齊賢魏恭憲王元佐之曾孫郇國公允成之孫遂昭裕公宗頽之長子母曰太原郡君郭氏初除右內率府副率歷率府率右千牛衛將軍右監門衛大將軍英宗即位遷右武衛大將軍撫州刺史今上即位遷右羽林軍大將軍辰州團練使侯幼不好弄長而樂善學尤精於漢書昭裕公素好學喜爲詩藏書萬卷侯能嗣承其志

目其詩曰貽慶集熙寧二年五月戊子以疾終享年三十有六上爲之輟視朝一日追贈華州觀察使封華陰侯夫人長安縣君劉氏男二人長曰士燮蚤卒幼曰士類右內率府率女六人四早卒二未嫁以某年十一月癸酉葬永

安縣銘曰

昭裕愛子以詩書教名而藏之志在則儆能守富貴爲諸侯孝

右屯衛大將軍令邦墓誌銘 熙寧二年作

右千牛衛大將軍令邦字安國冀康孝子惟吉之曾孫丹陽僖穆王守節之孫右龍武軍大將軍隴州防禦使世符之子也母曰南陽縣君張氏將軍生五年除太子內率府



副率英宗即位遷右監門率府率今上踐祚遷右千牛衛將軍  
熙寧二年五月甲午遇疾卒年十九贈右屯衛大將軍  
治平初英宗詔宗子無幼長皆就學差其年為大中小三  
品各置師以教之將軍時年十二從父南康修孝王愛其  
才性命為小學錄以表率群兒及年十五以新制試孝經  
論語於太宗正司二宗正以其誦習最精屢稱嘆之將軍  
起謝不敏拜於林下眾益美其警悟而不伐遂升中學授  
左氏春秋將軍事親至孝有疾至焚香於臂以禱請然親  
有過未嘗不諫爭其所為得禮義類皆如此不幸蚤世識  
之者無親疎共惜之二子男未名而一女尚幼是歲十一  
月癸酉葬於永安縣銘曰

學則敏行則孝志業修宜遠至命不融眾所悼

仁和縣君潘氏墓誌銘 熙寧二年作

皇從姪右武衛大將軍蓬州刺史令超之夫人曰仁和縣  
君潘氏故鄭王美之曾孫平州刺史惟熙之孫闕門祇候  
仁矩之子生十六年以選歸於蓬州使君封仁和縣君熙  
寧二年八月己未疾以卒享年二十有四生五子男子翺  
右內率府副率次二男未名二女早夭銘曰  
太勲之門克生令孫歸於帝族稟命天昏款文幽石以識  
塋園

皇從姪右屯衛大將軍士虬墓記 熙寧二年作

右千牛衛將軍士虬右武衛大將軍果州團練使齊安郡



公仲郃之子贈安化軍節度觀察留後高密郡公宗望之  
孫贈安遠軍節度使同中書門下平章事密國公允言之  
曾孫也母曰安康縣君李氏將軍生五歲以例賜名除右  
內率府副率明年遷右監門率府率今上踐阼遷右千牛  
衛將軍幼而秀慧不嬉戲異於常兒七歲始就學授孝經  
孜孜不捨晝夜教授劉仲章老儒生嘗於廣坐問之曰將  
軍誦孝經果有何得對曰事親孝故忠可移於君居家理  
故治可移於官此其所得也仲章驚嘆曰異日成長必爲  
德器數年僉首修立有成人之風親親尊尊動皆應法問  
安視膳朝夕無倦不幸遇疾以熙寧二年五月丙戌卒年  
十二宗室共嗟惜之朝廷贈右屯衛大將軍其年十一月

永安縣謹記

司馬文正公集略卷之三十